

中国古典文学名著百部

# 千家诗



● 宋 谢枋得

# 千家诗

(清) 王 相

(宋) 谢仿得

## 千家诗方框对应字一览表

页码	对应文字(如果一页方框太多,按其出现的先后顺序排列)		
第 4 页	醺	第 5 页	倅 翺
第 7 页	麋	第 10 页	蕨
第 26 页	蕨	第 34 页	跗
第 36 页	鲈 角	第 39 页	蕘 蕪
第 45 页	蕘 蕪	第 50 页	蕨
第 52 页	輶		

# 七言千家诗上

## 春日偶成

程颢

云淡风轻近午天，傍花随柳过前川。时人不识余心乐，将谓偷闲学少年。

## 春日

朱熹

胜日寻芳泗水滨，无边光景一时新。等闲识得东风面，万紫千红总是春。

## 春宵

苏轼

春宵一刻值千金，花有清香月有阴。歌管楼台声细细，秋千院落夜沉沉。

## 城东早春

杨巨源

诗家清景在新春，绿柳才黄半未匀。若待上林花似锦，出门俱是看花人。

## 春夜

王安石

金炉香烬漏声残，翦翦轻风阵阵寒。春色恼人眠不得，月移花影上栏杆。

## 初春小雨

韩愈

天街小雨润如酥，草色遥看近却无。最是一年春好处，绝胜烟柳满皇都。

## 元日

王安石

爆竹声中一岁除，春风送暖入屠苏。千门万户曈曈日，总把新桃换旧符。

## 上元侍宴

苏轼

淡月疏星绕建章，仙风吹下御炉香。侍臣鹄立通明殿，一朵红云捧玉皇。

## 立春偶成

张 栻

律回岁晚冰霜少，春到人间草木知。便觉眼前生意满，东风吹水绿参差。

## 打球图

晁无咎

阖闾千门万户开，三郎沈醉打球回。九龄已老韩休死，无复明朝谏疏来。

## 宫 词 其一

林 洪

金殿当头紫阁重，仙人掌上玉芙蓉。太平天子朝元日，五色云车驾六龙。

## 宫 词 其二

林 洪

殿上袞衣明日月，砚中旗影动龙蛇。纵横礼乐三千字，独对丹墀日未斜。

## 咏华清宫

王 建

行尽江南数十程，晓风残月入华清。朝元阁上西风急，都入长扬作雨声。

## 清平调词

李 白

云想衣裳花想容，春风拂槛露华浓。若非群玉山头见，会向瑶台月下逢。

## 题邸间壁

郑 谷

酴 香梦怯春寒，翠掩重门燕子闲。敲断玉钗红烛冷，计程应说到常山。

## 绝 句

杜 甫

两个黄鹂鸣翠柳，一行白鹭上青天。窗含西岭千秋雪，门泊东吴万里船。

## 海 棠

苏 轼

东风袅袅泛崇光，香雾空濛月转廊。只恐夜深花睡去，故烧高烛照红妆。

清 明 杜 牧

清明时节雨纷纷，路上行人欲断魂。借问酒家何处有，牧童遥指杏花村。

清 明 王 禹

无花无酒过清明，兴味萧然似野僧，昨日邻家乞新火，晓窗分与读书灯。

社 日 王 驾

鹅湖山下稻粱肥，豚栅鸡栖对掩扉。桑柘影斜春社散，家家扶得醉人归。

寒 食 韩

春城无处不飞花，寒食东风御柳斜。日暮汉宫传蜡烛，轻烟散入五侯家。

江 南 春 杜 牧

千里莺啼绿映红，水村山郭酒旗风。南朝四百八十寺，多少楼台烟雨中。

上高侍郎 高 蟾

天上碧桃和露种，日边红杏倚云栽。芙蓉生在秋江上，不向东风怨未开。

绝 句 僧志安

古木阴中系短篷，杖藜扶我过桥东。沾衣欲湿杏花雨，吹面不寒杨柳风。

游小园不值 叶绍翁

应怜屐齿印苍苔，小扣柴扉久不开。春色满园关不住，一枝红杏出墙来。

客 中 行 李 白

兰陵美酒郁金香，玉碗盛来琥珀光。但使主人能醉客，不知何处是他乡。

## 题 屏

刘季孙

呢喃燕子语梁间，底事来惊梦里闲？说与傍人浑不解，杖藜携酒看芝山。

## 漫 兴

杜 甫

肠断春江欲尽头，杖藜徐步立芳洲。颠狂柳絮随风舞，轻薄桃花逐水流。

## 庆全庵桃花

谢枋得

寻得桃源好避秦，桃红又是一年春。花飞莫遣随流水，怕有渔郎来问津。

## 玄都观桃花

刘禹锡

紫陌红尘拂面来，无人不道看花回。玄都观里桃千树，尽是刘郎去后栽。

## 再游玄都观

刘禹锡

百亩庭中半是苔，桃花净尽菜花开。种桃道士归何处？前度刘郎今又来。

## 滁州西涧

韦应物

独怜幽草涧边生，上有黄鹂深树鸣。春潮带雨晚来急，野渡无人舟自横。

## 花 影

苏 轼

重重叠叠上瑶台，几度呼童扫不开。刚被太阳收拾去，却教明月送将来。

## 北 山

王安石

北山输绿涨横陂，直壑回塘滟滟时。细数落花因坐久，缓寻芳草得归迟。

## 湖 上

徐元杰

花开红树乱莺啼，草上平湖白鹭飞。风日晴和人意好，夕阳箫鼓几船归。

## 漫 兴

杜 甫

糝径杨花铺白毡，点溪荷叶叠青钱。笋根稚子无人见，沙上鳧雏傍母眠。

## 春 晴

王 驾

雨前初见花间蕊，雨后全无叶底花。蜂蝶纷纷过墙去，却疑春色在邻家。

## 春 暮

曹 豳

门外无人问落花，绿阴冉冉遍天涯。林莺啼到无声处，青草池塘独听蛙。

## 落 花

朱淑贞

连理枝头花正开，妒花风雨便相摧。愿教青帝常为主，莫遣纷纷点翠苔。

## 春暮游小园

王 淇

一从梅粉褪残妆，涂抹新红上海棠。开到荼 花事了，丝丝天棘出莓墙。

## 莺 梭

刘克庄

掷柳迁乔大有情，交交时作弄机声。洛阳三月花如锦，多少工夫织得成。

## 暮春即事

叶 采

双双瓦雀行书案，点点杨花入砚池。闲坐小窗读周易，不知春去几多时。

## 登 山

李 涉

终日昏昏醉梦间，忽闻春尽强登山。因过竹院逢僧话，又得浮生半日闲。

## 蚕 妇 吟

谢枋得

子规啼彻四更时，起视蚕稠怕叶稀。不信楼头杨柳月，玉人舞歌未曾归。



## 晚 春

韩 愈

草木知春不久归，百般红紫斗芳菲。杨花榆荚无才思，惟解漫天作雪飞。

## 伤 春

杨万里

准拟今春乐事浓，依然枉却一东风。年年不带看花眼，不是愁中即病中。

## 送 春

王逢原

三月残花落更开，小檐日日燕飞来。子规半夜犹啼血，不信东风唤不回。

## 三月晦日送春

贾 岛

三月正当三十日，风光别我苦吟身。共君今夜不须睡，未到晓钟犹是春。

## 客中初夏

司马光

四月清和雨乍晴，南山当户转分明。更无柳絮因风起，惟有葵花向日倾。

## 约 客

赵师秀

黄梅时节家家雨，青草池塘处处蛙。有约不来过夜半，闲敲棋子落灯花。

## 初夏睡起

杨万里

梅子流酸溅齿牙，芭蕉分绿上窗纱。日长睡起无情思，闲看儿童捉柳花。

## 三衢道中

曾 纡

梅子黄时日日晴，小溪泛尽却山行。绿阴不减来时路，添得黄鹂四五声。

## 即 景

朱淑贞

竹摇清影罩幽窗，两两时禽噪夕阳。谢却海棠飞尽絮，困人天气日初长。

## 夏 日

戴复古

乳鸭池塘水浅深，熟梅天气半晴阴。东园载酒西园醉，摘尽枇杷一树金。

## 鄂州南楼书事

黄庭坚

四顾山光接水光，凭栏十里芰荷香。清风明月无人管，并作南来一味凉。

## 山亭夏日

高 骈

绿树阴浓夏日长，楼台倒影入池塘。水晶帘动微风起，满架蔷薇一院香。

## 田 家

范成大

昼出耘田夜绩麻，村庄儿女各当家。童孙未解供耕织，也傍桑阴学种瓜。

## 乡村四月

翁 卷

绿遍山原白满川，子规声里雨如烟。乡村四月闲人少，才了蚕桑又插田。

## 题 榴 花

朱 熹

五月榴花照眼明，枝间时见子初成。可怜此地无车马，颠倒苍苔落绛英。

## 村 晚

雷 震

草满池塘水满陂，山衔落日浸寒漪。牧童归去横牛背，短笛无腔信口吹。

## 茅 檐

王安石

茅檐常扫浮无苔，花木成蹊手自栽。一水护田将绿绕，两山排闥送青来。

## 乌 衣 巷

刘禹锡

朱雀桥边野草花，乌衣巷口夕阳斜。旧时王谢堂前燕，飞入寻常百姓家。

## 送使安西

王 维

渭城朝雨浥轻尘，客舍青青柳色新。劝君更尽一杯酒，西出阳关无故人。

## 题北榭碑

李 白

一为迁客去长沙，西望长安不见家。黄鹤楼中吹玉笛，江城五月落梅花。

## 题淮南寺

程 颢

南去北来休便休，白 吹尽楚江秋。道人不是悲秋客，一任晚山相对愁。

## 秋 月

程 颢

清溪流过碧山头，空水澄鲜一色秋。隔断红尘三十里，白云红叶两悠悠。

## 七 夕

杨 朴

未会牵牛意若何？须邀织女弄金梭。年年乞与人间巧，不道人间巧几多！

## 立 秋

刘武子

乳鸦啼散玉屏空，一枕新凉一扇风。睡起秋声无觅处，满阶梧叶月中明。

## 七 夕

杜 牧

银烛秋光冷画屏，轻罗小扇扑流萤。天街夜色凉如水，卧看牵牛织女星。

## 中 秋 月

苏 轼

暮云收尽溢清寒，银汉无声转玉盘。此生此夜不长好，明月明年何处看？

## 江楼有感

赵 嘏

独上江楼思悄然，月光如水水如天。同来玩月人何在？风景依稀似去年。

## 西 湖

林 升

山外青山楼外楼，西湖歌舞几时休？暖风薰得游人醉，直把杭州作汴州！

## 西 湖

杨万里

毕竟西湖六月中，风光不与四时同。接天莲叶无穷碧，映日荷花别样红。

## 湖上初雨

苏 轼

水光潋滟晴偏好，山色空濛雨亦奇。欲把西湖比西子，淡妆浓抹总相宜。

## 入 直

周必大

绿槐夹道集昏鸦，敕使传宣坐赐茶。归到玉堂清不寐，月钩初上紫薇花。

## 水 亭

蔡 确

纸屏石枕竹方床，手倦抛书午梦长。睡起莞然成独笑，数声渔笛在沧浪。

## 禁 锁

洪咨夔

禁门深锁寂无哗，浓墨淋漓两相麻。唱彻五更天未晓，一墀月浸紫薇花。

## 竹 楼

李嘉祐

傲吏身闲笑五侯，西江取竹起高楼。南风不用蒲葵扇，纱帽闲眠对水鸥。

## 直中书省

白居易

丝纶阁下文章静，钟鼓楼中刻漏长。独坐黄昏谁是伴？紫薇花对紫薇郎。

## 观书有感

朱 熹

半亩方塘一鉴开，天光云影共徘徊。问渠那得清如许，为有源头活水来。

## 泛舟

朱熹

昨夜江边春水生，艤艫巨舰一毛轻。向来枉费推移力，此日中流自在行。

## 冷泉亭

林逋

一泓清可沁诗脾，冷暖年来只自知。流出西湖载歌舞，回头不似在山时。

## 冬景

苏轼

荷尽已无擎雨盖，菊残犹有傲霜枝。一年好景君须记，最是橙黄橘绿时。

## 枫桥夜泊

张继

月落乌啼霜满天，江枫渔火对愁眠。姑苏城外寒山寺，夜半钟声到客船。

## 寒夜

杜小山

寒夜客来茶当酒，竹炉汤沸火初红。寻常一样窗前月，才有梅花便不同。

## 霜月

李商隐

初闻征雁已无蝉，百尺楼台水接天。青女素娥俱耐冷，月中霜里斗婵娟。

## 梅

王淇

不受尘埃半点侵，竹篱茅舍自甘心。只因误识林和靖，惹得诗人说到今。

## 早春

白玉蟾

南枝才放两三花，雪里吟香弄粉些。淡淡著烟浓著月，深深笼水浅笼沙。

## 雪梅 其一

卢梅坡

梅雪争春未肯降，骚人阁笔费评章。梅须逊雪三分白，雪却输梅一段香。

## 雪 梅 其二

卢梅坡

有梅无雪不精神，有雪无诗俗了人。日暮诗成天又雪，与梅并作十分春。

## 答钟弱翁

牧 童

草铺横野六七里，笛弄晚风三四声。归来饱饭黄昏后，不脱蓑衣卧月明。

## 秦淮夜泊

杜 牧

烟笼寒水月笼沙，夜泊秦淮近酒家。商女不知亡国恨，隔溪犹唱后庭花。

## 归 雁

钱 起

潇湘何事等闲回？水碧沙明两岸苔。二十五弦弹夜月，不胜清怨却飞来。

## 题 壁

无名氏

一团茅草乱蓬蓬，蓦地烧天蓦地空。争似满炉煨榾柮，漫腾腾地暖烘烘。

# 七言千家诗下

## 早朝大明宫

贾 至

银烛朝天紫陌长，禁城春色晓苍苍。千条弱柳垂青琐，百啭流莺绕建章。  
剑佩声随玉墀步，衣冠身惹御炉香。共沐恩波凤池上，朝朝染翰侍君王。

## 和贾舍人早朝

杜 甫

五夜漏声催晓箭，九重春色醉仙桃。旌旗日暖龙蛇动，宫殿风微燕雀高。  
朝罢香烟携满袖，诗成珠玉在挥毫。欲知世掌丝纶美，池上于今有凤毛。

## 和贾舍人早朝

王 维

绛帟鸡人报晓筹，尚衣方进翠云裘。九天阊阖开宫殿，万国衣冠拜冕旒。  
日色才临仙掌动，香烟欲傍衮龙浮。朝罢须裁五色诏，佩声归到凤池头。

## 和贾舍人早朝

岑 参

鸡鸣紫陌曙光寒，莺啭皇州春色阑。金阙晓钟开万户，玉阶仙仗拥千官。  
花迎剑珮星初落，柳拂旌旗露未干。独有凤凰池上客，阳春一曲和皆难。

## 上元应制

蔡 襄

高列千峰宝炬森，端门方喜翠华临。宸游不为三元夜，乐事还同万众心。  
天上清光留此夕，人间和气阁春阴。要知尽庆华封祝，四十余年惠爱深。

## 上元应制

王 珪

雪中华月满仙台，万烛当楼宝扇开。双凤云中扶辇下，六鳌海上驾山来。  
镐京春酒沾周宴，汾水秋风陋汉才。一曲升平人尽乐，君王又进紫霞杯。

## 侍 宴

沈 佺期

皇家贵主好神仙，别业初开云汉边。山出尽如鸣凤岭，池成不让饮龙川。

妆楼翠幌教春住，舞阁金铺借日悬。侍从乘舆来此地，称觞献寿乐钧天。

## 答丁元珍

欧阳修

春风疑不到天涯，二月山城未见花。残雪压枝犹有橘，冻雷惊笋欲抽芽。  
夜闻啼雁生乡思，病入新年感物华。曾是洛阳花下客，野芳虽晚不须嗟。

## 插花吟

邵雍

头上花枝照酒后，酒卮中有好花枝。身经两世太平日，眼见四朝全盛时。  
况复筋骸粗康健，那堪时节正芳菲。酒涵花影红光溜，争忍花前不醉归。

## 寓意

晏殊

油壁香车不再逢，峡云无迹任西东。梨花院落溶溶月，柳絮池塘淡淡风。  
几日寂寥伤酒后，一番萧索禁烟中。鱼书欲寄何由达？水远山长处处同！

## 寒食

赵元镇

寂寂柴门村落里，也教插柳纪年华。禁烟不到粤人国，上冢亦携庞老家。  
汉寝唐陵无麦饭，山溪野径有梨花。一樽竟藉青苔卧，莫管城头奏暮笳。

## 清明

黄庭坚

佳节清明桃李笑，野田荒冢只生愁。雷惊天地龙蛇蛰，雨足郊原草木柔。  
人乞祭馀骄妾妇，士甘焚死不公侯。贤愚千载知谁是，满眼蓬蒿共一丘。

## 清明

高菊磻

南北山头多墓田，清明祭扫各纷然。纸灰飞作白蝴蝶，泪血染成红杜鹃。  
日落狐狸眠冢上，夜归儿女笑灯前。人生有酒须当醉，一滴何曾到九泉！

## 郊行即事

程颢

芳原绿野恣行时，春入遥山碧四围。兴逐乱红穿柳巷，困临流水坐苔矶。  
莫乱盏酒十分劝，祇恐风花一片飞。况是清明好天气，不妨游衍莫忘归。



## 秋 千

僧惠洪

画架双裁翠络偏，佳人春戏小楼前。飘扬血色裙拖地，断送玉容人上天。  
花板润沾红杏雨，彩绳斜挂绿杨烟。下来闲处从容立，疑是蟾宫谪降仙。

## 曲江对酒 其一

杜 甫

一片花飞减却春，风飘万点正愁人。且看欲尽花经眼，莫厌伤多酒入唇。  
江上小堂巢翡翠，苑边高冢卧麒麟。细推物理须行乐，何用浮名绊此身？

## 曲江对酒 其二

杜 甫

朝回日日典春衣，每日江头尽醉归。酒债寻常行处有，人生七十古来稀。  
穿花蛱蝶深深见，点水蜻蜓款款飞。传语风光共流转，暂时相赏莫相违。

## 黄 鹤 楼

崔 颢

昔人已乘黄鹤去，此地空余黄鹤楼。黄鹤一去不复返，白云千载空悠悠。  
晴川历历汉阳树，芳草萋萋鹦鹉洲。日暮乡关何处是？烟波江上使人愁。

## 旅 怀

崔 涂

水流花谢两无情，送尽东风过楚城。蝴蝶梦中家万里，杜鹃枝上月三更。  
故园书动经年绝，华发春催两鬓生。自是不归归便得，五湖烟景有谁争？

## 答 李 儋

韦应物

去年花里逢君别，今日花开又一年。世事茫茫难自料，春愁黯黯独成眠。  
身多疾病思田里，邑有流亡愧俸钱。闻道欲来相问讯，西楼望月几回圆。

## 江 村

杜 甫

清江一曲抱村流，长夏江村事事幽。自去自来梁上燕，相亲相近水中鸥。  
老妻画纸为棋局，稚子敲针作钓钩。多病所须惟药物，微躯此外复何求？

## 夏 日

张 耒

长夏江村风日清，檐牙燕雀已生成。蝶衣晒粉花枝舞，蛛网添丝屋角晴。

落落疏帘邀月饮，嘈嘈虚枕纳溪声。久斑两鬓如霜雪，直欲樵渔过此生。

## 辋川积雨

王 维

积雨空林烟火迟，蒸藜炊黍饷东菑。漠漠水田飞白鹭，阴阴夏木啭黄鹂。  
山中习静观朝槿，松下清斋折露葵。野老与人争席罢，海鸥何事更相疑？

## 新 竹

陆 游

插棘编篱谨护持，养成寒碧映涟漪。清风掠地秋先到，赤日行天午不知。  
解箨时闻声簌簌，放梢初见影离离。归闲我欲频来此，枕簟仍教到处随。

## 表兄话旧

窦叔向

夜合花开香满庭，夜深微雨醉初醒。远书珍重何由答？旧事凄凉不可听。  
去日儿童皆长大，昔年亲友半凋零。明朝又是孤舟别，愁见河桥酒幔青。

## 偶 成

程 颢

闲来无事不从容，睡觉东窗日已红。万物静观皆自得，四时佳兴与人同。  
道通天地有形外，思入风云变态中。富贵不淫贫贱乐，男儿到此是豪雄。

## 游 月 陂

程 颢

月坡堤上四徘徊，北有中天百尺台。万物已随秋气改，一樽聊为晚凉开。  
水心云影闲相照，林下泉声静自来。世事无端何足计，但逢佳节约重陪。

## 秋 兴 其一

杜 甫

玉露凋伤枫树林，巫山巫峡气萧森。江间波浪兼天涌，塞上风云接地阴。  
丛菊两开他日泪，孤舟一系故园心。寒衣处处催刀尺，白帝城高急暮砧。

## 秋 兴 其三

杜 甫

千家山郭静朝晖，日日江楼坐翠微。信宿渔人还泛泛，清秋燕子故飞飞。  
匡衡抗疏功名薄，刘向传经心事违。同学少年多不贱，五陵裘马自轻肥。

## 秋 兴 其五 杜 甫

蓬莱宫阙对南山，承露金茎霄汉间。西望瑶池降王母，东来紫气满函关。  
云移稚尾开宫扇，日绕龙鳞识圣颜。一卧沧江惊岁晚，几回青琐点朝班。

## 秋 兴 其七 杜 甫

昆明池水汉时功，武帝旌旗在眼中。织女机丝虚夜月，石鲸鳞甲动秋风。  
波飘菰米沉云黑，露冷莲房坠粉红。关塞极天惟鸟道，江湖满地一渔翁。

## 月夜舟中 戴复古

满船明月浸虚空，绿水无痕夜气冲。诗思浮沈橹影里，梦魂摇曳橹声中。  
星辰冷落碧潭水，鸿雁悲鸣红蓼风。数点渔灯依古岸，断桥垂露滴梧桐。

## 长安秋望 赵 嘏

云物凄凉拂曙流，汉家宫阙动高秋。残星几点雁横塞，长笛一声人倚楼。  
紫艳半开篱菊静，红衣落尽渚莲愁。鲈鱼正美不归去，空戴南冠学楚囚。

## 新 秋 杜 甫

火云犹未敛奇峰，欹枕初惊一叶风。几处园林萧瑟里，谁家砧杵寂寥中。  
蝉声断续悲残月，萤焰高低照暮空。赋就金门期再献，夜深搔首叹飞蓬！

## 中 秋 李 朴

皓魄当空宝镜升，云间仙籁寂无声。平分秋色一轮满，长伴云衢千里明。  
狡兔空从弦外落，妖蟆休向眼前生。灵槎拟约同携手，更待银河彻底清。

## 九日蓝田会饮 杜 甫

老去悲秋强自宽，兴来今日尽君欢。羞将短发还吹帽，笑倩旁人为正冠。  
蓝水远从千涧落，玉山高并两峰寒。明年此会知谁健？醉把茱萸仔细看。

## 秋 思 陆 游

利欲驱人万火牛，江湖浪迹一沙鸥。日长似岁闲方觉，事大如天醉亦休。

砧杵敲残深巷月，梧桐摇落故园秋。欲舒老眼无高处，安得元龙百尺楼。

## 与朱山人

杜甫

锦里先生乌角巾，园收芋栗未全贫。惯看宾客儿童喜，得食阶除鸟雀驯。  
秋水才深四五尺，野航恰受二三人。白沙翠竹江村暮，相送柴门月色新。

## 闻笛

赵嘏

谁家吹笛画楼中，断续声随断续风。响遏行云横碧落，清和冷月到帘栊。  
兴来三弄有桓子，赋就一篇怀马融。曲罢不知人在否，余音嘹唳尚飘空。

## 冬景

刘克庄

晴窗早觉爱朝曦，竹外秋声渐作威。命仆安排新暖阁，呼童熨贴旧寒衣。  
叶浮嫩绿酒初熟，橙切香黄蟹正肥。蓉菊满园皆可羨，赏心从此莫相违。

## 冬至

杜甫

天时人事日相催，冬至阳生春又来。刺绣五纹添弱线，吹葭六管动飞灰。  
岸容待腊将舒柳，山意冲寒欲放梅。云物不殊乡国异，教儿且覆掌中杯。

## 梅花

林逋

众芳摇落独鲜妍，占断风情向小园。疏影横斜水清浅，暗香浮动月黄昏。  
霜禽欲下先偷眼，粉蝶如知合断魂。幸有微吟可相狎，不须檀板共金樽。

## 自咏

韩愈

一封朝奏九重天，夕贬潮阳路八千。本为圣朝除弊政，敢将衰朽惜残年。  
云横秦岭家何在，雪拥蓝关马不前。知汝远来应有意，好收吾骨瘴江边。

## 干戈

王中

干戈未定欲何之？一事无成两鬓丝。踪迹大纲王粲传，情怀小样杜陵诗。  
鶺鴒音断人千里，乌鹊巢寒月一枝。安得中山千日酒，酩酊直到太平时。

## 归 隐

陈 抟

十年踪迹走红尘，回首青山入梦频。紫绶纵荣争及睡，朱门虽富不如贫。  
愁闻剑戟扶危主，闷听笙歌聒醉人。携取旧书归旧隐，野花啼鸟一般春。

## 时 世 行

杜荀鹤

夫因兵死守蓬茅，麻苧裙衫鬓发焦。桑柘废来犹纳税，田园荒尽尚徵苗。  
时挑野菜和根煮，旋斫生柴带叶烧。任是深山最深处，也应无计避征徭。

## 送 天 师

宁献王

霜落芝城柳影疏，殷勤送客出鄱湖。黄金甲锁雷霆印，红锦韬缠日月符。  
天上晓行骑只鹤，人间夜宿解双凫。匆匆归到神仙府，为问蟠桃熟也无？

## 送毛伯温

明世宗

大将南征胆气豪，腰横秋水雁翎刀。风吹鼙鼓山河动，电闪旌旗日月高。  
天上麒麟原有种，穴中蝼蚁岂能逃。太平待诏归来日，朕与先生解战袍。

# 五言千家诗上

## 春 晓

孟浩然

春眠不觉晓，处处闻啼鸟。夜来风雨声，花落知多少。

## 访袁拾遗不遇

孟浩然

洛阳访才子，江岭作流人。闻说梅花早，何如此地春。

## 送郭司仓

王昌龄

映门淮水绿，留骑主人心。明月随良掾，春潮夜夜深。

## 洛 阳 道

储光羲

大道直如发，春日佳气多。五陵贵公子，双双鸣玉珂。

## 独坐敬亭山

李 白

众鸟高飞尽，孤云独去闲。相看两不厌，只有敬亭山。

## 登鹳鹊楼

王之涣

白日依山尽，黄河入海流。欲穷千里目，更上一层楼。

## 观永乐公主入蕃

孙 逖

边地莺花少，年来未觉新。美人天上落，龙塞始应春。

## 春 怨

金昌绪

打起黄莺儿，莫教枝上啼。啼时惊妾梦，不得到辽西。

## 左掖梨花

丘 为

冷艳全欺雪，馀香乍入衣。春风且莫定，吹向玉阶飞。

## 思 君 恩

令狐楚

小苑莺歌歇，长门蝶舞多。眼看春又去，翠辇不曾过。

## 题袁氏别业

贺知章

主人不相识，偶坐为林泉。莫谩愁沽酒，囊中自有钱。

## 夜送赵纵

杨 炯

赵氏连城璧，由来天下传。送君还旧府，明月满前川。

## 竹 里 馆

王 维

独坐幽篁里，弹琴复长啸。深林人不知，明月来相照。

## 送朱大入秦

孟浩然

游人五陵去，宝剑值千金。分手脱相赠，平生一片心。

## 长 干 行

崔 颢

君家在何处？妾住在横塘。停船暂借问，或恐是同乡。

## 咏 史

高 适

尚有绨袍赠，应怜范叔寒。不知天下士，犹作布衣看。

## 罢 相 作

李适之

避贤初罢相，乐圣且衔杯。为问门前客，今朝几个来？

## 逢侠者

钱 起

燕赵悲歌士，相逢剧孟家。寸心言不尽，前路日将斜。

## 江行望匡庐

钱 珣

咫尺愁风雨，匡庐不可登。祇疑云雾窟，犹有六朝僧。

## 答李浣

韦应物

林中观易罢，溪上对鸥闲。楚俗饶词客，何人最往还？

## 秋 风 引

刘禹锡

何处秋风至？萧萧送雁群。朝来入庭树，孤客最先闻。

## 秋夜寄丘员外

韦应物

怀君属秋夜，散步咏凉天。山空松子落，幽人应未眠。

## 秋 日

耿 滢

返照入闾巷，忧来谁共语？古道少人行，秋风动禾黍。

## 秋日湖上

薛 莹

落日五湖游，烟波处处愁。浮沉千古事，谁与问东流？

## 宫 中 题

文宗皇帝

辇路生秋草，上林花满枝。凭高何限意，无复侍臣知。

## 寻隐者不遇

贾 岛

松下问童子，言师采药去。只在此山中，云深不知处。



## 汾上惊秋

■

北风吹白云，万里渡河汾。心绪逢摇落，秋声不可闻。

## 蜀道后期

张 说

客心争日月，来往预期程。秋风不相待，先至洛阳城。

## 静夜思

李 白

床前明月光，疑是地上霜。举头望明月，低头思故乡。

## 秋 浦 歌

李 白

白发三千丈，缘愁似个长。不知明镜里，何处得秋霜？

## 赠乔侍御

陈子昂

汉庭荣巧宦，云阁薄边功。可怜骢马使，白首为谁雄？

## 答武陵太守

王昌龄

仗剑行千里，微躯敢一言。曾为大梁客，不负信陵恩。

## 行军九日思长安故园

岑 参

强欲登高去，无人送酒来。遥怜故园菊，应傍战场开。

## 婕 妤 怨

皇甫冉

花枝出建章，凤管发昭阳。借问承恩者，双蛾几许长？

## 题竹林寺

朱 放

岁月人间促，烟云此地多。殷勤竹林寺，更得几回过！

## 三 闾 庙

戴叔伦

沅湘流不尽，屈子怨何深！日暮秋风起，萧萧枫树林。

## 易水送别

骆宾王

此地别燕丹，壮士发冲冠。昔时人已没，今日水犹寒。

## 别卢秦卿

司空曙

知有前期在，难分此夜中。无将故人酒，不及石尤风。

## 答 人

太上隐者

偶来松下，高枕石头眠。山中无历日，寒尽不知年。

# 五言千家诗下

## 幸蜀回至剑门

玄宗皇帝

剑门横云峻，銮舆出狩回。翠屏千仞合，丹嶂五丁开。灌木萦旗转，仙云拂马来。乘时方在德，嗟尔勒铭才。

## 和晋陵陆丞《早春游望》

杜审言

独有宦游人，偏惊物候新。云霞出海曙，梅柳渡江春。淑气催黄鸟，晴光转绿。忽闻歌古调，归思欲沾巾。

## 蓬莱三殿侍宴奉敕咏终南山

杜审言

北斗挂城边，南山倚殿前。云标金阙迥，树杪玉堂悬。半岭通佳气，中峰绕瑞烟。小臣持献寿，长此戴尧天。

## 春夜别友人

陈子昂

银烛吐清烟，金尊对绮筵。离堂思琴瑟，别路绕山川。明月隐高树，长河没晓天。悠悠洛阳去，此会在何年？

## 长宁公主东庄侍宴

李峤

别业临青甸，鸣銮降紫霄。长筵鹓鹭集，仙管凤凰调。树接南山近，烟含北渚遥。承恩咸已醉，恋赏未还镳。

## 恩赐丽正殿书院宴应制得林字

张说

东壁图书府，西园翰墨林。诵诗闻国政，讲易见天心。位窃和羹重，恩叨醉酒深。载歌春兴曲，情竭为知音。

## 送友人

李白

青山横北郭，白水绕东城。此地一为别，孤蓬万里征。浮云游子意，落日故人情。

挥手自兹去，萧萧班马鸣。

## 送友人入蜀

李 白

见说蚕丛路，崎岖不易行。山从人面起，云傍马头生。芳树笼秦栈，春流绕蜀城。升沉应已定，不必问君平。

## 次北固山下

王 湾

客路青山外，行舟绿水前。潮平两岸阔，风正一帆悬。海日生残夜，江春入旧年。乡书何处达，归雁洛阳边。

## 苏氏别业

祖 咏

别业居幽处，到来生隐心。南山当户牖，沔水映园林。竹覆经冬雪，庭昏未夕阴。寥寥人境外，闲坐听春禽。

## 春宿左省

杜 甫

花隐掖垣暮，啾啾栖鸟过。星临万户动，月傍九霄多。不寝听金钥，因风想玉珂。明朝有封事，数问夜如何。

## 题玄武禅师屋壁

杜 甫

何年顾虎头，满壁画沧洲。赤日石林气，青天江海流。锡飞常近鹤，杯渡不惊鸥。似得庐山路，真随惠远游。

## 终南山

王 维

太乙近天都，连山到海隅。白云回望合，青霭入看无。分野中峰变，阴晴众壑殊。欲投人处宿，隔水问樵夫。

## 寄左省杜拾遗

岑 参

联步趋丹陛，分曹限紫薇。晓随天仗入，暮惹御香归。白发悲花落，青云羨鸟飞。圣朝无阙事，自觉谏书稀。

## 登总持阁

岑 参

高阁逼诸天，登临近日边。晴开万井树，愁看五陵烟。槛外低秦岭，窗中小渭川。早知清净理，常愿奉金仙。

## 登兖州城楼

杜 甫

东郡趋庭日，南楼纵目初。浮云连海岱，平野入青徐。孤嶂秦碑在，荒城鲁殿馀。从来多古意，临眺独踟躇。

## 送杜少府之任蜀州

王 勃

城阙辅三秦，风烟望五津。与君离别意，同是宦游人。海内存知己，天涯若比邻。无为在歧路，儿女共沾巾。

## 送崔融

杜审言

君王行出将，书记远从征。祖帐连河阙，军麾动洛城。旌旗朝朔气，笳吹夜边声。坐觉烟尘扫，秋风古北平。

## 扈从登封途中作

宋之问

帐殿郁崔嵬，仙游寔壮哉！晓云连幕卷，夜火杂星回。谷暗千旗出，山鸣万乘来。扈游良可赋，终乏掞天才。

## 题义公禅房

孟浩然

义公习禅寂，结宇依空林。户外一峰秀，阶前众壑深。夕阳连雨足，空翠落庭阴。看取莲花净，方知不染心。

## 醉后赠张九旭

高 适

世上漫相识，此翁殊不然。兴来书自圣，醉后语尤颠。白发老闲事，青云在目前。床头一壶酒，能更几回眠？

## 玉台观

杜 甫

浩劫因王造，平台访古游。彩云萧史驻，文字鲁恭留。宫阙通群帝，乾坤到十洲。

人传有笙鹤，时过北山头。

## 观李固请司马弟山水图

杜 甫

方丈浑连水，天台总映云。人间长见画，老去恨空闻。范蠡舟偏小，王乔鹤不群。此生随万物，何处出尘氛？

## 旅夜书怀

杜 甫

细草微风岸，危樯独夜舟。星随平野阔，月涌大江流。名岂文章著，官因老病休。飘飘何所似？天地一沙鸥。

## 登岳阳楼

杜 甫

昔闻洞庭水，今上岳阳楼。吴楚东南坼，乾坤日夜浮。亲朋无一字，老病有孤舟。戎马关山北，凭轩涕泗流。

## 江南旅情

祖 咏

楚山不可极，归路但萧条。海色晴看雨，江声夜听潮。剑留南斗近，书寄北风遥。为报空潭橘，无媒寄洛桥。

## 宿龙兴寺

綦母潜

香刹夜忘归，松清古殿扉。灯明方丈室，珠系比丘衣。白日传心净，青莲喻法微。天花落不尽，处处鸟衔飞。

## 破山寺后禅院

常 建

清晨入古寺，初日照高林。曲径通幽处，禅房花木深。山光悦鸟性，潭影空人心。万籁此俱寂，惟闻钟磬音。

## 题松汀驿

张 祜

山色远含空，苍茫泽国东。海明先见日，江白迥闻风。鸟道高原去，人烟小径通。那知旧遗逸，不在五湖中。

## 圣果寺

释处默

路自中峰上，盘回出薜萝。到江吴地尽，隔岸越山多。古木丛青藓，遥天浸白波。下方城郭近，钟磬杂笙歌。

## 野望

王绩

东皋薄暮望，徙倚欲何依。树树皆秋色，山山惟落晖。牧人驱犊返，猎马带禽归。相顾无相识，长歌怀采薇。

## 送别崔著作东征

陈子昂

金天方肃杀，白露始专征。王师非乐战，之子送佳兵。海气侵南部，边风扫北平。莫卖卢龙塞，归邀麟阁名。

## 携妓纳凉晚际遇雨 其一

杜甫

落日放船好，轻风生浪迟。竹深留客处，荷净纳凉时。公子调冰水，佳人雪藕丝。片云头上黑，应是雨催诗。

## 携妓纳凉晚际遇雨 其二

杜甫

雨来沾席上，风急打船头。越女红裙湿，燕姬翠黛愁。缆侵堤柳系，幔卷浪花浮。归路翻萧飒，陂塘五月秋。

## 宿云门寺阁

孙逖

香阁东山下，烟花象外幽。悬灯千嶂夕，卷幔五湖秋。画壁余鸿雁，纱窗宿斗牛。更疑天路近，梦与白云游。

## 秋登宣城谢朓北楼

李白

江城如画里，山晓望晴空。两水夹明镜，双桥落彩虹。人烟寒橘柚，秋色老梧桐。谁念北楼上，临风怀谢公。

## 临洞庭

孟浩然

八月湖水平，涵虚混太清。气蒸云梦泽，波撼岳阳城。欲济无舟楫，端居耻圣明。

坐观垂钓者，徒有羨鱼情。

## 过香积寺

王 维

不知香积寺，数里入云峰。古木无人径，深山何处钟。泉声咽危石，日色冷青松。薄暮空潭曲，安禅制毒龙。

## 送郑侍御谪闽中

高 适

谪去君无恨，闽中我旧过。大都秋雁少，只是夜猿多。东路云山合，南天瘴疠和。自当逢雨露，行矣顺风波。

## 秦州杂诗

杜 甫

凤林戈未息，鱼海路常难。候火云风峻，悬军幕井乾。风连西极动，月过北庭寒。故老思飞将，何时议筑坛！

## 禹 庙

杜 甫

禹庙空山里，秋风落日斜。荒庭垂橘柚，古屋画龙蛇。云气生虚壁，江深走白沙。早知乘四载，疏凿控三巴。

## 望 秦 川

李 颀

秦川朝望迥，日出正东峰。远近山河净，逶迤城阙重。秋声万户竹，寒色五陵松。有客归欤叹，凄其霜露浓。

## 同王徵君洞庭有怀

张 谓

八月洞庭秋，潇湘水北流。还家万里梦，为客五更愁。不用开书帙，偏宜上酒楼。故人京洛满，何日复同游？

## 渡扬子江

丁仙芝

桂楫中流望，空波两岸明。林开扬子驿，山出润州城。海尽边阴静，江寒朔吹生。更闻枫叶下，淅沥度秋声。



## 幽州夜饮

张 说

凉风吹夜雨，萧瑟动寒林。正有高堂宴，能忘迟暮心。军中宜剑舞，塞上重笳音。不作边城将，谁知恩遇深。

# 附：笠翁对韵

## 笠翁对韵上卷

### 一 东

天对地 雨对风 大陆对长空 山花对海树 赤日对苍穹 雷隐隐 雾濛濛 日下对  
天中 风高秋月白 雨霁晚霞红 牛女二星河左右 参商两曜斗西东 十月塞边飒飒寒霜  
惊戍旅 三冬江上漫漫朔雪冷渔翁

### 其 二

河对汉 绿对红 雨伯对雷公 烟楼对雪洞 月殿对天宫 云叆叇 日曛曛 蜡屐对  
渔篷 过天星似箭 吐魄月如弓 驿旅客逢梅子雨 池亭人挹藕花风 茅店村前浩月坠林  
鸡唱韵 板桥路上青霜锁道马行踪

### 其 三

山对海 华对嵩 四岳对三公 宫花对禁柳 塞雁对江龙 清暑殿 广寒宫 拾翠对  
题红 庄周梦化蝶 吕望兆飞熊 北牖当风停夏扇 南帘曝日省冬烘 鹤舞楼头玉笛弄残  
仙子月 凤翔台上紫箫吹断美人风

### 二 冬

晨对午 夏对冬 下饷对高春 青春对白昼 古柏对苍松 垂钓客 荷锄翁 仙鹤对  
神龙 凤冠珠闪烁 螭带玉玲珑 三元及第才千顷 一品当朝禄万钟 花萼楼间仙李盘根  
调国脉 沉香亭畔娇杨擅宠起边风

### 其 二

清对淡 薄对浓 暮鼓对晨钟 山茶对石菊 烟锁对云封 金萸萸 玉芙蓉 绿绮对  
青锋 早汤先宿酒 晚食继朝饔 唐库金钱能化蝶 延津宝剑会成龙 巫峡浪传云雨荒唐  
神女庙 岱宗遥望儿孙罗列丈人峰

### 其三

繁对简 叠对重 意懒对心慵 仙翁对释伴 道范对儒宗 花灼灼 草茸茸 浪蝶对狂蜂 数竿君子竹 五树大夫松 高皇灭项凭三杰 虞帝承尧殛四凶 内苑佳人满地风光愁不尽 边关过客连天烟草憾无穷

### 三江

奇对偶 只对双 大海对长江 金盘对玉盏 宝烛对银缸 朱漆槛 碧纱窗 舞调对歌腔 兴汉推马武 谏夏著龙逢 四收列国群王伏 三筑高城众敌降 跨凤登台潇洒仙姬秦弄玉 斩蛇当道英雄天子汉刘邦

### 其二

颜对貌 像对庞 步辇对徒杠 停针对搁竺 意懒对心降 灯闪闪 月幢幢 揽辔对飞艘 柳堤驰骏马 花院吠村龙 酒量微酹琼杏颊 香尘没印玉莲 诗写丹枫韩文幽怀流节水 泪弹斑竹舜妃遗憾积馮江

### 四支

泉对石 干对枝 吹竹对弹丝 山亭对水榭 鹦鹉对鸂鶒 五色笔 十香词 泼墨对传后 神奇韩干画 雄浑李陵诗 几处花街新夺锦 有人香径淡凝脂 万里烽烟战士边头争要塞 一犁膏雨农夫村外尽乘时

### 其二

蒨对醢 赋对诗 点漆对描脂 璠簪对珠履 剑客对琴师 沽酒价 买山资 国色对仙姿 晚霞明似锦 春雨细如丝 柳绊长堤千万树 花横野寺两三枝 紫盖黄旗天象预占江左地 青袍白马童谣终应寿阳儿

### 其三

箴对赞 缶对卮 萤焰对蚕丝 轻裾对长袖 瑞草对灵芝 流涕策 断肠诗 喉舌对腰肢 云中熊虎将 天上凤凰儿 禹庙千年垂橘柚 尧阶三尺覆茅茨 湘竹含烟腰下轻纱笼玳瑁 海棠经雨脸边清泪湿胭脂

## 其 四

争对让 望对思 野葛对山柈 仙风对道骨 天造对人为▲ 转诸剑 博浪椎 经  
纬对干支 位尊民物主 德重帝王师 望切不妨人去远 心忙无奈马行迟 金屋闭来赋乞  
茂林题柱笔 玉楼成后记须昌谷负囊词

## 五 微

贤对圣 是对非 觉奥对参微 鱼书对雁字 草舍对柴扉 鸡晓唱 雉朝飞 红瘦对  
绿肥 举杯邀月饮 骑马踏花归 黄盖能成赤壁捷 陈平善解白登危 太白书堂瀑泉垂地  
三千丈 孔明祀庙老柏参天四十围

## 其 二

戈对甲 幄对帷 荡荡对巍巍 严滩对邵圃 靖菊对夷薇 占鸿渐 采凤飞 虎榜对  
龙旗 心中罗锦绣 口内吐珠玑 宽宏豁达高皇量 叱咤喑哑霸王威 灭项兴刘狡兔尽  
时走狗死 连吴拒魏貔貅屯处卧龙归

## 其 三

衰对盛 密对稀 祭服对朝衣 鸡窗对雁塔 秋榜对春闱 乌衣巷 燕子矶 久别对  
初归 天姿真窈窕 圣德实光辉 蟠桃紫阙来金母 岭荔红尘进玉妃 霸王军营亚父丹心  
撞玉斗 长安酒市谪仙狂兴换银龟

## 六 鱼

羹对饭 柳对榆 短袖对长裾 鸡冠对凤尾 芍药对芙蕖 周有若 汉相如 王屋对  
匡庐 月明山寺远 风细水亭虚 壮士腰间三尺剑 男儿腹内五车书 疏影暗香和靖孤山  
梅蕊放 轻阴清昼渊明旧宅柳条舒

## 其 二

吾对汝 尔对余 选授对升除 书箱对药柜 耒耜对耰锄 参虽鲁 回不愚 阙阅对  
闾阎 诸侯千乘国 命妇七香车 穿云采药闻仙犬 踏雪寻梅策蹇驴 玉兔金乌二气精灵  
为日月 洛龟河马五行生剋在图书

## 其三

欵对正 密对疏 囊囊对苞苴 罗浮对壶峤 水曲对山纒 骏鹤驾 待鸾舆 杰溺对长沮 博虎卞庄子 当熊冯婕妤 南阳高士吟梁父 西蜀才人赋子虚 三径风光白石黄花 供杖履 五湖烟景青山绿水在樵渔

## 七虞

红对白 有对无 布穀对提壶 毛锥对羽扇 天阙对皇都 谢蝴蝶 郑鹧鸪 蹈海对归湖 花肥春雨润 竹瘦晚风疏 麦饭豆糜终创汉 蓴羹 脍竟归吴 琴调轻弹杨柳月中 潜去听 酒旗斜挂杏花村里其来沽

## 其二

罗对绮 茗对蔬 柏秀对松枯 中元对上巳 返璧对还珠 云梦泽 洞庭湖 玉烛对冰壶 苍头犀角带 绿鬃象牙梳 松阴白鹤声相应 镜里青鸾影不孤 竹户半开对牖不知人在否 柴门深闭停车还有客来无

## 其三

宾对主 婢对奴 宝鸭对金凫 升堂对入室 鼓瑟对投壶 觥合璧 颂联珠 提瓮对当垆 仰高红日近 望远白云孤 歆向秘书窥二酉 机云芳誉动三吴 祖饯三杯老去常斟 花下酒 荒田五亩归来独荷月中锄

## 其四

君对父 魏对吴 北岳对西湖 菜蔬对茶淡 芭藤对菖蒲 梅花数 竹叶符 廷议对山呼 两都班固赋 八阵孔明图 田庆紫荆堂下茂 王褒青柏墓前枯 出塞中郎瓶有乳时 归汉室 质秦太子马生角日返燕都

## 八齐

鸾对凤 犬对鸡 塞北对关西 长生对益智 老幼对旅倪 颁竹策 翦桐圭 剥枣对蒸梨 绵腰如弱柳 嫩手似柔荑 狡兔能穿三穴隐 鹪鹩权借一枝栖 里先生策杖垂绅 扶少主 於陵仲子辟纻织履赖贤妻

## 其二

鸣对吠 泛对栖 燕语对莺啼 珊瑚对玛瑙 琥珀对玻璃 绛县老 伯州犁 测蠡对  
然犀 榆槐堪作荫 桃李自成蹊 投巫救女西门豹 赁浣逢妻百里奚 阙里门墙陋巷规模  
原不陋 隋堤基址迷楼踪迹亦全迷

## 其三

越对赵 楚对齐 柳岸对桃溪 纱窗对绣户 画阁对香闺 修月斧 上天梯 蟠螭  
对虹霓 行乐游春圃 工谏病夏畦 李广不对空射虎 魏明得立为存麈 按辔徐行细柳功  
成劳王敬 闻声稍卧临泾名震止儿啼

## 九 佳

门对户 陌对街 枝叶对根荑 斗鸡对挥尘 凤髻对鸾钗 登楚岫 渡秦淮 子犯对  
夫差 石鼎龙头缩 银筝雁翅排 百年诗礼延余庆 万里风云入壮怀 能辨名伦死矣野哉  
悲季路 不由径窦生乎愚也有高柴

## 其二

冠对履 袜对鞋 海角对天涯 鸡人对虎旅 六市对三阶 陈俎豆 戏堆埋 皎皎对  
皑皑 贤相聚东阁 良朋集小斋 梦里山川书越绝 枕边风月记齐谐 三径萧疏彭泽高风  
怡五柳 六朝华贵琅琊佳气种三槐

## 其三

勤对俭 巧对乖 水榭对山斋 冰桃对雪藕 漏箭对更牌 寒翠袖 贵荆钗 慷慨对  
诙谐 竹径风声籁 花溪月影筛 携囊佳韵随时贮 荷锄沉酣到处埋 江海孤踪云浪风涛  
惊旅梦 乡关万里烟峦云树切归怀

## 其 四

杞对梓 桧对楷 水泊对山崖 舞裙对歌袖 玉陛对瑶阶 风入袂 月盈怀 虎兕对  
狼豺 马融堂上帐 羊侃水中斋 北面黉宫宜拾芥 东巡岱畧定燔柴 锦缆春江横笛洞箫  
通碧落 华灯夜月遗簪堕翠遍香街

## 十 灰

春对夏 喜对哀 大手对长才 风清对月朗 地阔对天开 游阆苑 醉蓬莱 七政对  
三台 青龙壶老杖 白燕玉人钗 香风十里望仙阁 明月一天思子台 玉橘冰桃王母几因  
求道降 莲舟藜杖真人原为读书来

## 其 二

朝对暮 去对来 庶矣对康哉 马肝对鸡肋 杏眼对桃腮 佳兴适 好怀开 朔雪对  
春雷 云移鸕鹚观 日晒凤凰台 河边淑气迎芳草 林下轻风待落梅 柳媚花明燕语莺  
声浑是笑 松号柏舞猿啼鹤唳总成哀

## 其 三

忠对信 博对该 忖度对疑猜 香消对烛暗 鹊喜对蛩哀 金花报 玉镜台 倒罍对  
衔杯 岩巖横老树 石磴覆苍苔 雪满山中高士卧 月明林下美人来 绿柳沿堤皆因苏子  
来时种 碧桃满观尽是刘郎去后栽

## 十一 真

莲对菊 凤对麟 浊富对清贫 渔庄对佛舍 松盖对花茵 萝月叟 葛天民 国宝对  
家珍 草迎金埒马 花醉玉楼人 巢燕三春尝唤友 塞鸿八月始来宾 古往今来谁见泰山  
曾作砺 天长地久人传沧海几扬尘

## 其 二

兄对弟 吏对民 父子对君臣 勾丁对甫甲 赴卯对同寅 折桂客 簪花人 四皓对  
三仁 王乔云外鸟 郭泰雨中巾 人交好友求三益 士有贤妻备五伦 文教南宣武帝平蛮  
开百越 义旗西指韩侯扶汉卷三秦

## 其 三

申对午 侃对穉 阿魏对茵陈 楚兰对湘芷 碧柳对青筠 花馥馥 叶萋萋 粉颈对  
朱唇 曹公奸似鬼 尧帝智如神 南阮才郎差北富 东邻丑女效西颦 色艳北堂草号忘忧  
忧甚事 香浓南国花名含笑笑何人

## 十二文

忧对喜 戚对欣 二典对三坟 佛经对仙语 夏耨对春耕 烹早韭 剪春芹 暮雨对朝云 竹间斜白接 花下醉红裙 掌握灵符五岳▲箒 腰悬宝剑七星纹 金锁未开上相趋 听宫漏永 珠帘半卷群僚仰对御炉薰

## 其二

词对赋 懒对勤 类聚对群分 鸾箫对凤笛 带草对香芸 燕许笔 韩柳文 旧话对新闻 赫赫周南仲 翩翩晋右军 六国说成苏子贵 两京收复郭公勋 汉阙陈书侃侃忠言推贾谊 唐廷对策岩岩直谏有刘

## 其三

言对笑 绩对勋 鹿豕对羊 星冠对月扇 把袂对书裙 汤事葛 说兴殷 萝月对松云 西池青鸟使 北塞黑鸦军 文武成康为一代 魏吴蜀汉定三分 桂苑秋宵明月三杯邀客 松麴亭夏日薰风一曲奏桐君

## 十三元

卑对长 季对昆 永巷对长门 山亭对水阁 旅舍对军屯 杨子渡 谢公墩 德重对年尊 承乾对出震 叠坎对重坤 志士报君思犬马 仁王养老察鸡豚 远水平沙有客泛舟桃叶渡 斜风细雨何人携榼杏花村

## 其二

君对相 祖对孙 夕照对朝曛 兰台对桂殿 海岛对山村 碑堕泪 赋招魂 报怨对怀恩 陵埋金吐气 田种玉生根 相府珠帘垂白昼 边城画阁动黄昏 枫叶半山秋去烟霏堪倚杖 梨花满地夜来风雨不开门

## 十四寒

家对国 治对安 地主对天官 坎男对离女 周诰对殷盘 三三暖 九九寒 杜撰对包弹 古壁蛩声匝 闲亭鹤影单 燕出帘边春寂寂 莺闻枕上漏珊珊 池柳烟飘日夕郎归青锁闼 砌花雨过月明人倚玉栏干



## 其二

肥对瘦 窄对宽 黄犬对青鸾 指环对腰带 洗钵对投竿 诛佞剑 进贤冠 画栋对雕栏 双垂白玉筋 九转紫金丹 陕右棠高怀召伯 河南花满忆潘安 陌上芳春弱柳当风披彩线 池中清晓碧荷承露捧珠盘

## 其三

行对卧 听对看 鹿洞对鱼滩 蛟腾对豹变 虎踞对龙蟠 风凜凜 雪漫漫 手辣对心酸 莺莺对燕燕 小小对端端 蓝水远从千涧落 玉山高并两峰寒 至圣不凡嬉戏六龄陈俎豆 老莱大孝承欢七袞舞斑斓

## 十五删

林对坞 岭对峦 昼永对春闲 谋深对望重 任大对投艰 裙袅袅 佩珊珊 守塞对当关 密云千里合 新月一钩弯 叔宝君臣皆纵逸 重华父母是嚣顽 名动帝畿西蜀三苏来日下 壮游京洛东吴二陆起云间

## 其二

临对仿 吝对慳 讨逆对平蛮 忠肝对义胆 雾发对云鬟 埋笔冢 烂柯山 月貌对天颜 龙潜终得跃 鸟倦亦知还 陇树飞来鹦鹉绿 池筠密处鹧鸪斑 秋露横江苏子月明游赤壁 冻雪迷岭韩公雪拥过蓝关

## 笠翁对韵下卷

### 一 先

寒对暑 日对年 蹴鞠对鞦韆 丹山对碧水 淡雨对覃烟 歌宛转 貌婣娟 雪鼓对云笳 荒芦栖南雁 疏柳噪秋蝉 洗耳尚逢高士笑 折腰肯受小儿怜 郭泰泛舟折角半垂梅子雨 山涛骑马接 倒着杏花天

### 其二

轻对重 肥对坚 碧玉对青钱 郊寒对岛瘦 酒圣对诗仙 依玉树 步金莲 凿井对耕田 杜甫清宵立 边韶白昼眠 豪饮客吞波底月 酣游人醉水中天 斗草青郊几行宝马

嘶金勒 看花紫陌千里香车拥翠钿

### 其 三

吟对咏 授对传 乐矣对凄然 风鹏对雪雁 董杏对周莲 春九十 岁三千 钟鼓对  
管弦 入山逢宰相 无事即神仙 霞映武陵桃淡淡 烟荒隋堤柳绵绵 七碗月团啜罢清风  
生腋下 三杯云液饮余红雨晕腮边

### 其 四

中对外 后对先 树下对花前 玉柱对金屋 叠嶂对平川 孙子策 祖生鞭 盛席对  
华筵 解醉知茶力 消愁识酒权 丝剪菱荷开东沼 锦妆凫雁泛温泉 帝女衔石海中遗魄  
为精卫 蜀王叫月枝上游魂化杜鹃

### 二 萧

琴对管 斧对瓢 水怪对花妖 秋声对春色 白缣对红绡 臣五代 事三朝 斗柄对  
弓腰 醉客歌金缕 佳人品玉箫 风定落花闲不扫 霜余残叶湿难烧 千载兴周尚父一竿  
投渭水 百年霸越钱王万弩射江潮

### 其 二

荣对悴 夕对朝 露地对云霄 商彝对周鼎 殷纣对虞韶 樊素口 小蛮腰 六诏对  
三苗 朝天车奕奕 出塞马萧萧 公子幽兰重泛舸 王孙芳草正联镳 潘岳高怀曾向秋天  
吟蟋蟀 王维清兴尝於雪夜画芭蕉

### 其 三

耕对读 牧对樵 琥珀对琼瑶 兔毫对鸿爪 桂楫对兰桡 鱼潜藻 鹿藏蕉 水远对  
山遥 湘灵能鼓瑟 嬴女解吹箫 雪点寒梅横小院 风吹弱柳覆平桥 月牖通宵绛蜡罢时  
光不减 风帘当昼雕盘停后篆难消

### 三 肴

诗对礼 卦对爻 燕引对莺调 晨钟对暮鼓 野饌对山肴 雉方乳 鹊始巢 猛虎对  
神獒 疏星浮荇叶 皓月上松梢 为邦自古推瑚琏 从政於今愧斗筲 管鲍相知能交忘形  
胶漆友 藟藟有隙终为刎颈死生交

## 其二

歌对舞 笑对嘲 耳语对神交 焉鸟对亥豕 獭髓对鸾胶 宜久敬 莫轻抛 一气对  
同胞 祭遵甘布被 张祿念绋袍 花径风来逢客访 柴扉月到有僧敲 夜雨中园一颗不雕  
王子柰 秋风江上三重曾卷杜公茅

## 其三

衙对舍 廩对庖 玉磬对金铙 竹林对梅岭 起凤对腾蛟 蛟绡帐 兽锦袍 露果对  
风梢 扬州轮橘柚 荆土贡菁茅 断蛇埋地称孙叔 渡蚁作桥识宋郊 好梦难成蛩响阶前  
偏唧唧 良朋远到鸡声窗外正嘤嘤

## 四 豪

菱对茨 荻对蒿 山麓对江螯 莺簧对蝶板 麦浪对桃涛 骐驎足 凤凰毛 美誉对  
嘉褒 文人窥蠹简 学士书兔毫 马援南征载薏苡 张骞西使进葡萄 辨口悬河万语千言  
常亶亶 词源倒峡连篇累牍自滔滔

## 其二

梅对杏 李对桃 棫朴对旌旄 酒仙对诗史 德泽对恩膏 悬一榻 梦三刀 拙逸对  
贵劳 玉堂花烛绕 金殿月轮高 孤山看鹤盘云下 蜀道闻猿向月号 万事从人有花有酒  
应自乐 百年皆客一邱一壑尽吾豪

## 其三

台对省 蜀对曹 分袂对同袍 鸣琴对击剑 返辙对回轺 良借箸 操捉刀 香茶对  
醇醪 滴泉归海大 箕土积山高 石室客来煎雀舌 画堂宾至饮羊羔 被谪贾生湘水凄凉  
吟鹏鸟 遭谗屈子江潭憔悴著离骚

## 五 歌

微对巨 少对多 直干对平柯 蜂媒对蝶使 雨笠对烟蓑 眉淡扫 面微酡 妙舞对  
清歌 轻衫裁夏葛 薄袂剪春罗 将相兼行唐李靖 霸王杂用汉萧何 月本阴精岂有羿妻  
曾窃药 星为夜宿浪传织女漫投梭

## 其二

慈对善 虐对苛 缥缈对婆娑 长杨对细柳 嫩蕊对寒莎 追风马 挽日戈 玉液对金波 紫诏衔丹凤 黄庭换白鹅 画阁江城梅作调 兰舟野渡竹为歌 门外雪飞错认空中飘柳絮 岩边瀑响误疑天半落银河

## 其三

松对竹 荇对荷 薜荔对藤萝 梯云对步月 樵唱对渔歌 升鼎雉 听经鹅 北海对东坡 吴郎哀废宅 邵子乐行窝 丽水良金皆待冶 崑山美玉总须磨 雨过皇州琉璃色 灿华清瓦 风来帝苑荷芰香飘太液波

## 其四

笼对槛 巢对窝 及第对登科 冰清对玉润 地利对人和 韩擒虎 荣驾鹅 青女对素娥 破头朱泚笏 折齿谢鲲梭 留客酒杯应恨少 动人诗句不须多 绿野凝烟但听村前双牧笛 沧江积雪惟看滩上一渔蓑

## 六 麻

清对浊 美对嘉 鄙吝对矜夸 花须对柳眼 屋角对檐牙 志和宅 博望槎 秋实对春华 乾炉烹白雪 坤鼎炼丹砂 深宵望冷沙场月 边塞听残野戍笳 满院松风钟声隐隐为僧舍 半窗花月锡影依依是道家

## 其二

雷对电 雾对霞 蚁阵对蜂衙 寄梅对怀橘 酿酒对烹茶 宜男草 益母花 杨柳对蒹葭 班姬辞帝辇 蔡琰泣胡笳 舞榭歌楼千万尺 竹篱茅舍两三家 珊枕半床月明时梦飞塞外 银箏一奏花落处人在天涯

## 其三

圆对缺 正对斜 笑语对咨嗟 沈腰对潘鬓 孟笋对卢茶 百舌鸟 两头蛇 帝里对仙家 尧仁敷率土 舜德被流沙 桥上授书曾纳履 壁间题句已笼纱 远塞迢迢露碛风沙何可极 长沙渺渺雪涛烟浪信无涯

## 其 四

疏对密 朴对华 义鹘对慈鸦 鹤群对雁阵 白苎对黄麻 读三到 吟八叉 肃静对  
喧哗 围棋兼把钓 沈李并浮瓜 羽客片时能煮石 孤禅千劫似蒸沙 党尉粗豪金帐笼香  
斟美酒 陶生清逸银铛融雪啜团茶

## 七 阳

台对阁 沼对塘 朝雨对夕阳 游人对隐士 谢女对秋娘 三寸舌 九回肠 玉液对  
琼浆 秦皇照胆镜 徐肇返魂香 青萍夜啸芙蓉匣 黄卷时摊薜荔床 元亨利贞天地一机  
成化育 仁义礼智圣贤千古立纲常

## 其 二

红对白 绿对黄 昼永对更长 龙飞对凤舞 锦缆对牙樯 云弁使 雪衣娘 故国对  
他乡 雄文能徙鳄 艳曲为求凰 九日高峰惊落帽 暮春曲水喜流觞 僧占名山云绕茂林  
藏古殿 客栖胜地风飘落叶响空廊

## 其 三

衰对壮 弱对强 艳饰对新妆 御龙对司马 破竹对穿杨 读班马 识求羊 水色对  
山光 仙棋藏绿橘 客枕梦黄粱 池草入诗因有梦 海棠带恨为无香 风起画堂帘箔影翻  
青苻沼 月斜金井辘轳声度碧梧墙

## 其 四

臣对子 帝对王 日月对风霜 乌台对紫府 雪牖对云房 香山社 昼锦堂 郤屋对  
岩廊 芬椒涂内壁 文杏饰高梁 贫女幸分东壁影 幽人高卧北窗凉 绣阁探春丽日半笼  
青镜色 水亭醉夏薰风常透碧筒香

## 八 庚

形对貌 色对声 夏邑对周京 江云对涧树 玉磬对银筝 人老老 我卿卿 晓燕对  
春莺 玄霜舂玉杵 白露贮金茎 贾客君山秋弄笛 仙人缑岭夜吹笙 帝业独兴尽道汉高  
能用将 父书空读谁言赵括善知兵

## 其二

功对业 性对情 月上对云行 乘龙对附骥 阆苑对蓬瀛 春秋笔 月旦评 东作对西成 隋珠光照乘 和璧价连城 三箭三人唐将勇 一琴一鹤赵公清 汉帝求贤诏访严滩 逢故旧 宋廷优老年尊洛社重耆英

## 其三

昏对旦 晦对明 久雨对新晴 蓼湾对花港 竹友对梅兄 黄石叟 丹邱生 犬吠对鸡鸣 暮山云外断 新水月中平 半榻清风宜午梦 一犁好雨趁春耕 王旦登庸误我十年 迟作相 刘 不第愧他多士早成名

## 九 青

庚对甲 己对丁 魏阙对彤庭 梅妻对鹤子 珠箔对银屏 鸳浴沼 鹭飞汀 鸿雁对鶺鴒 人间寿者相 天上老人星 八月好修攀桂斧 三春须系护花铃 江阁凭临一水净连天际碧 石栏闲倚群山秀向雨余青

## 其二

危对乱 泰对宁 纳陛对趋庭 金盘对玉箸 泛梗对浮萍 群圃 典 对新型 骑牛闲读史 牧豕自横经 秋首田中禾颖重 春余园内菜花馨 旅次凄凉塞月江风皆惨淡 筵前欢笑燕歌赵舞独娉婷

## 十 蒸

对蓼 芡对菱 雁弋对鱼罾 齐纨对鲁绮 蜀锦对吴綾 星渐没 日初升 九聘对三徵 萧何曾作吏 贾岛昔为僧 贤人视履循规矩 大匠挥斤校准绳 野渡春风人喜乘潮移酒舫 江天暮雨客愁隔岸对渔灯

## 其二

谈对吐 谓对称 冉闵对颜曾 侯嬴对伯嚭 祖逖对孙登 抛白紵 宴红綾 胜友对良朋 争名如逐鹿 谋利似趋蝇 仁杰姨惭周不仕 王陵母识汉方兴 句写穷愁浣花寄迹传工部 诗吟变乱凝碧伤心叹右丞

## 十一 尤

荣对辱 喜对忧 缱绻对绸缪 吴娃对越女 野马对沙鸥 茶解渴 酒消愁 白眼对苍头 马迁修史记 孔子作春秋 莘野耕夫闲举耜 渭滨渔夫晚垂钓 龙马游河羲帝因图而画卦 神龟出洛禹王取法以明畴

## 其 二

冠对履 舄对裘 院小对庭幽 面墙对膝地 错智对良筹 孤嶂耸 大江流 芳泽对圆邱 花潭来越唱 柳屿起吴讴 莺懒燕忙三月雨 蛩摧蝉退一天秋 钟子听琴荒径入林山寂寂 谪仙捉月洪涛接岸水悠悠

## 其 三

鱼对鸟 鹊对鸠 翠馆对红楼 七贤对三友 爱日对悲秋 虎类狗 蚁如牛 列辟对诸侯 陈唱临春乐 隋歌清夜游 空中事业麒麟阁 地下文章鹦鹉洲 旷野平原猎士马蹄轻似箭 斜风细雨牧童牛背稳如舟

## 十二 侵

歌对曲 啸对吟 往古对来今 山头对水面 远浦对遥岑 勤三上 惜寸阴 茂树对平林 卞和三献玉 杨震四知金 青皇风暖催芳草 白帝城高急暮砧 绣虎雕龙才子窗前挥彩笔 描鸾刺凤佳人帘下度金针

## 其 二

登对眺 涉对临 瑞雪对甘霖 主欢对民乐 交浅对言深 耻三战 乐七擒 顾曲对知音 大车行槛槛 驷马骤駉駉 紫电青虹腾剑气 高山流水识琴心 屈子怀君极浦吟风悲泽畔 王郎忆友扁舟卧雪访山阴

## 十三 覃

宫对阙 座对龛 水北对天南 蜃楼对蚁郡 伟论对高谈 遴杞梓 树榷楠 得一对函三 八宝珊瑚枕 双珠玳瑁簪 萧王待士心惟赤 卢相欺君面独蓝 贾岛诗狂手拟敲门行处想 张颠草圣头能濡墨写时酣

## 其 二

闻对见 解对谳 三橘对双柑 黄童对白叟 静女对奇男 秋七七 径三三 海色对山岚 鸾声何啾啾 虎视正眈眈 仪封疆吏知尼父 函谷关人识老聃 江相归池止水自盟 真是止 吴公作宰贪泉虽饮亦何贪

## 十四 盐

宽对猛 冷对炎 清直对尊严 云头对雨脚 鹤发对龙髯 风台谏 肃堂廉 保泰对鸣谦 五湖归范蠡 三径隐陶潜 一剑成功堪佩印 百钱满卦便垂帘 浊酒停杯容我半酣 愁际饮 好花傍座看他微笑悟时拈

## 其 二

连对断 减对添 淡泊对安恬 回头对极目 水底对山尖 腰袅袅 手纤纤 凤卜对鸾占 开田多种粟 煮海尽成盐 居同九世张公艺 恩给千人范仲淹 箫弄凤来秦女有缘 能跨羽 鼎成龙去轩臣无计得攀髯

## 其 三

人对己 爱对嫌 举止对观瞻 四知对三语 义正对辞严 勤雪案 课风檐 漏箭对书笺 文繁归獭祭 体艳别香奁 昨夜题诗更一字 早春来燕卷重帘 诗以史名愁里悲歌 怀杜甫 笔经人索梦中显晦老江淹

## 十五 咸

栽对植 薏对芡 二伯对三监 朝臣对国老 职事对官衔 鹿麇麇 兔毚毚 启牒对开缄 绿杨莺啁啾 红杏燕呢喃 半篙白酒娱陶令 一枕黄粱度吕岩 九夏炎飙长日风 亭留客骑 三冬寒冽漫天雪浪驻征帆

## 其 二

梧对杞 柏对杉 夏穉对韶咸 涧瀍对溱洧 瓠洛对崤函 藏书洞 避诏岩 脱俗对超凡 贤人羞献媚 正士嫉工谗 霸越谋臣推少伯 佐唐藩将重浑瑊 邺下狂生羯鼓三挝 羞锦袄 江州司马琵琶一曲湿青衫



## 其 三

袍对笏 履对衫 匹马对孤帆 琢磨对雕镂 刻划对镌鐫 星北拱 日西衔 卮漏对  
鼎饌 江边生桂若 海外树都咸 但得恢恢存利刃 何须咄咄达空函 彩凤知音乐典后 夔  
须九奏 金人守口圣如尼父亦三缄

# 附：唐司空图诗品详注

## 雄浑第一

大用外腴，真体内充。返虚入浑，积健为雄。具备万物，横绝太空。荒荒油云，寥寥长风。超以象外，得其环中。持之非强，来之无穷。

## 冲淡第二

素处以默，妙机其微。饮之太和，独鹤与飞。犹之惠风，荏苒在衣。阅音修篁，美曰载归。遇之匪深，即之愈希。脱有形似，握手已违。

## 沈著第三

绿林野屋，落日气清。脱巾独步，时闻鸟声。鸿雁不来，之子远行。所思不远，若为平生。海风碧云，夜渚月明。如有佳语，大河前横。

## 高古第四

畸人乘真，手把芙蓉。泛彼浩劫，窅然空踪。月出东斗，好风相从。太华夜碧，人闻清钟。虚伫神素，脱然畦封。黄唐在独，落落玄宗。

## 纤秾第五

采采流水，蓬蓬远春。窈窕深谷，时见美人。碧桃满树，风日水滨。柳阴路曲，流莺比邻。乘之愈往，识之愈真。如将不尽，与古为新。

## 典雅第六

玉壶买春，赏雨茆屋。坐中佳士，左右修竹。白云初晴，幽鸟相逐。眠琴绿阴，上有飞瀑。落花无言，人淡如菊。书之岁华，其日可读。

## 洗炼第七

如矿出金，如铅出银。超心炼冶，绝爱缁磷。空潭泻春，古镜照神。体素储洁，乘月

返真。载瞻星气，载歌幽人。流水今日，明月前身。

## 劲健第八

行神如空，行气如虹。巫峡千寻，走云连风，饮真茹强，蓄素守中，喻彼行健，是谓存雄。天地与立，神化攸同。期之以实，御之以终。

## 绮丽第九

神存富贵，始轻黄金。浓尽必枯，淡者屡深。雾余水畔，红杏在林。月明华屋，画桥碧阴。金尊酒满，伴客弹琴。取之自足，良殫美襟。

## 自然第十

俯拾即是，不取诸邻。俱道适往，著手成春。如逢花开，如瞻岁新。真与不夺，强得易贫。幽人空山，过雨采。薄言情悟，悠悠天钧。

## 含蓄第十一

不著一字，尽得风流。语不涉己，若不堪忧。是有真宰，与之沉浮。如渌满酒，花时返秋。悠悠空尘，忽忽海沓。浅深聚散，万取一收。

## 豪放第十二

观花匪禁，吞吐大荒。由道返气，处得以狂。天风浪浪，海山苍苍。真力弥满，万象在旁。前超三辰，后引凤凰。晓策六鳌，濯足扶桑。

## 精神第十三

欲返不尽，相期与来。明漪绝底，奇花初胎。青春鹦鹉，杨柳楼台。碧山人来，清酒深杯。生气远出，不著死灰。妙造自然，伊谁与裁。

## 缜密第十四

是有真迹，如不可知。意象欲出，造化已奇。水流花开，清露未晞。要路愈远，幽行为迟。语不欲犯，思不欲痴。犹春於绿，明月雪时。

## 疏野第十五

惟性所宅，真取弗羈。控物自富，与率为期。筑室松下，脱帽看诗。但知旦暮，不辨何时。倘然适意，岂必有为。若其天放，如是得之。

## 清奇第十六

娟娟群松，下有漪流。晴雪满汀，隔溪渔舟。可人如玉，步履寻幽。载瞻载止，空碧悠悠。神出古异，澹不可收。如月之曙，如气之秋。

## 委曲第十七

登彼太行，翠绕羊肠。杳霭流玉，悠悠花香。力之於时，声之於羌。似往已回，如幽匪藏。水理漩洑，鹏风翱翔。道不自器，与之圆方。

## 实境第十八

取语甚直，计思匪深。忽逢幽人，如见道心。清涧之曲，碧松之阴。一客荷樵，一客听琴。情性所至，妙不自寻。遇之自天，冷然希音。

## 悲慨第十九

大风卷水，林木为摧。适苦欲死，招憩不来。百岁如流，富贵冷灰。大道日丧，若为雄才。壮士拂剑，浩然弥哀。萧萧落叶，漏雨苍苔。

## 形容第二十

绝伫灵素，少回清真。如觅水影，如写阳春。风云变态，花草精神。海之波澜，山之嶙峋。俱似大道，妙契同尘。离形得似，庶几斯人。

## 超诣第二十一

匪神之灵，匪机之微。如将白云，清风与归。远引若至，临之已非。少有道气，终与俗违。乱山乔木，碧苔芳晖。诵之思之，其声愈希。

## 飘逸第二十二

落落欲往，矫矫不群。缙山之鹤，华顶之云。高人惠中，令色綎纁。御风蓬叶，泛彼

无垠。如不可执，如将有闻。识者期之，欲得愈分。

## 旷达第二十三

生者百岁，相去几何。欢乐苦短，忧愁实多。如何尊酒，日往烟萝。花覆茆檐，疏雨相过。倒酒既尽，杖藜行歌。熟不有古，南山峨峨。

## 流动第二十四

若纳水，如转丸珠。夫岂可道，假体如愚。荒荒坤轴，悠悠天枢。载要其端，载闻其符。超超神明，返返冥无。来往千载，是之谓乎。